

নদী রক্ষা করতে না পারলে আমাদের অস্তিত্ব বিপন্ন হবে-নৌপরিবহন প্রতিমন্ত্রী
টঙ্গী নদী বন্দর হতে ঢাকা বৃত্তাকার নৌপথে স্পীডবোট সার্ভিস চালু

টঙ্গী (গাজীপুর) ১০ সেপ্টেম্বর ২০২২;

পাঁচটি দ্রুতগামী স্পীডবোট দিয়ে আজ টঙ্গী নদী বন্দর হতে ঢাকা বৃত্তাকার নৌপথে
স্পীডবোট সার্ভিস চালু করা হয়েছে। বেসরকারী উদ্যোগে প্রথম পর্যায়ে
টঙ্গী/আবুল্লাহপুর-কড়া এবং টঙ্গী/আবুল্লাহপুর (গাজীপুর)-উলুখুল (কালীগঞ্জ) এ দুটি
রুটে স্পীডবোট চলাচল করবে। টঙ্গী/আবুল্লাহপুর-কড়া ভাড়া ১৫০ টাকা; সময় লাগবে
২৫ মিনিট এবং টঙ্গী/আবুল্লাহপুর (গাজীপুর)-উলুখুল (কালীগঞ্জ) ভাড়া ১২০ টাকা; সময়
লাগবে ১৯ মিনিট। পর্যায়ক্রমে যাত্রী চাহিদার আলোকে কড়া-গাবতলী এবং গাবতলী-
সদরঘাট এ দুটি নৌরূটে স্পীডবোট চালু করা হবে।

নৌপরিবহন প্রতিমন্ত্রী খালিদ মাহমুদ চৌধুরী এম.পি এবং যুব ও ক্রীড়া প্রতিমন্ত্রী জাহিদ
আহসান রাসেল এমপি আজ টঙ্গী নদী বন্দরে টঙ্গী নদী বন্দর হতে ঢাকা বৃত্তাকার নৌপথে
স্পীডবোট সার্ভিসের উদ্বোধন করেন।

এর আগে প্রতিমন্ত্রীদ্বয় টঙ্গী নদী বন্দরে বিআইডব্লিউটিএ'র ইকোপার্ক উদ্বোধন করেন।

এসময় অন্যান্যের মধ্যে নৌপরিবহন মন্ত্রণালয়ের সচিব মোঃ মোস্তফা কামাল,
বিআইডব্লিউটিএ'র চেয়ারম্যান কমডোর গোলাম সাদেক, নৌপুলিশ প্রধান মোঃ শফিকুল
ইসলাম, গাজীপুর মেট্রোপলিটন পুলিশের কমিশনার মোল্লা নজরুল ইসলাম, জেলা
প্রশাসক আনিসুর রহমান উপস্থিত ছিলেন।

প্রধান অতিথির বক্তৃতায় নৌপরিবহন প্রতিমন্ত্রী খালিদ মাহমুদ চৌধুরী বলেন, নদী রক্ষা
করতে না পারলে আমাদের অস্তিত্ব বিপন্ন হবে। শিল্প কারখানার মালিকদের উদ্দেশ্য করে
প্রতিমন্ত্রী বলেন, আপনারা নিজস্ব বর্জ্য প্লান সচল রাখুন। নদীতে ময়লা ফেলে পরিবেশ
নষ্ট করবেন না। বিশ্বের মুসলমানদের ধর্মীয় জামাত বিশ্ব ইজতেমা টুঙ্গির তুরাগ পাড়ে
হয়। এর মাধ্যমে বিশ্ববাসীর কাছে বাংলাদেশকে পরিচিতি করছে। সারাবিশ্বের থেকে
মুসলমানরা এই জমায়েতে শরীক হয় মুসলিম উম্মার সাফল্য কামনায় দোয়া করেন। কিন্তু
আমরা তাদের বিশুদ্ধ (পবিত্র) পানি উপহার দিতে পারি না। সবাই সচেতন হব এবং নদীতে
ময়লা- আবর্জনা ফেলব না। তিনি বলেন, প্রধানমন্ত্রীর অঙ্গীকার দেশে ১০ হাজার নৌপথের
মধ্যে সাত হাজার সচল করা হয়েছে। বঙ্গবন্ধুর হত্যার নেপথ্যের কুশীলবদের চিহ্নিত
করতে আগামী ১৬ থেকে ৩১ ডিসেম্বরের মধ্যে কমিশন গঠন হবে যা আইনমন্ত্রী ঘোষণা
করেছেন। বঙ্গবন্ধুর হত্যাকারীদের বিচারের মাধ্যমে দেশে আইনের শাসন প্রতিষ্ঠিত
হয়েছে।

যুব ও ক্রীড়া প্রতিমন্ত্রী জাহিদ আহসান রাসেল বলেন, কতিপয় অসাধু মানুষের অতি-
মুনাফার আশায় আজ নদীগুলো মৃত। বর্জ্য ফেলায় সবাইকে সচেতন হওয়ার আহবান
জানান।

উল্লেখ্য, ঢাকা শহরের চারিদিকে বৃত্তাকার নৌপথ চালু করে সড়কপথে যানবাহনের চাপ
কমানো এবং নৌপথে সাশ্রয়ীমূল্যে যাত্রী ও মালামাল পরিবহন ব্যবস্থা চালু করার লক্ষ্যে
কয়েকটি ধাপে ঢাকার চারটি নদীর ১১০ কিলোমিটারে নৌপথে নৌযান পরিচালনার
পদক্ষেপ নেয়া হয়। বিআইডব্লিউটিএ কর্তৃক বৃত্তাকার নৌপথের নদী খননসহ নয়টি

ল্যান্ডিং স্টেশন নির্মাণের মাধ্যমে নৌপথে চালু করা হয়। বর্তমানে উক্ত নৌপথে মালামাল পরিবহন ব্যবস্থায় গুরুত্ব পেলেও লো-হাইটের ব্রীজ, অতিরিক্ত সময় এবং যাত্রীবান্ধব পরিবেশের অভাবে সাশ্রয়ীমূল্যে পরিবহন ব্যবস্থা যাত্রীবান্ধব করা সম্ভব হয়নি। পরবর্তী সময়ে বিআইড্রিউটিসি কর্তৃক ওয়াটার বাস চালু করা হলেও বিভিন্ন কারণে তা বর্তমানে বন্ধ রয়েছে। বর্তমানে টঙ্গী নদী বন্দর হতে বৃত্তাকার নৌপথে যাত্রী চাহিদা বৃদ্ধি পাওয়ায় দ্রুতগামী স্পীডবোট-চালুর পদক্ষেপ নেয়া হয়। তাছাড়া যাত্রী চাহিদার আলোকে ঢাকা শহরের বৃত্তাকার নৌপথে নতুন নৌপথ সৃষ্টি করে দ্রুতগামী স্পীডবোট চালুর আরো পদক্ষেপ নেয়া হবে। ঢাকার বৃত্তাকার নৌপথে স্পীডবোট চালু হলে উক্ত এলাকার জনগণ যানজটমুক্ত ও সাশ্রয়ীমূল্যে গন্তব্যে পৌঁছাতে পারবে এবং সড়ক পথে যানবাহনের চাপ কমাতে সহায়তা করবে।

টঙ্গী ইকোপার্ক উদ্বোধন

১১ কোটি ৬৬ লক্ষ টাকা ব্যয়ে নির্মিত টঙ্গী ইকোপার্ক আজ উদ্বোধন করা হয়েছে। টঙ্গী ইকোপার্ক নির্মাণ কাজটি ৮ নভেম্বর ২০২০ শুরু হয়ে ১৫ এপ্রিল ২০২২ সম্পন্ন হয়েছে। টঙ্গী নদী বন্দর এলাকায় ৩.০ একর অধিগ্রহণকৃত ভূমির মধ্যে ২.৫ একর ভূমিতে ইকোপার্কটি নির্মিত হয়। ইকোপার্কটি নির্মাণের ফলে অত্র এলাকার সর্বস্তরের জনগণের কাঞ্চুত বিনোদনসহ দৃষ্টিনন্দন পরিবেশে পরিবার পরিজন নিয়ে অবসর সময় কাটাতে সহায়তা করবে। তাছাড়া নদীর তীরভূমি দখলরোধ করে সরকারের রাজস্ব আয় বৃদ্ধি পাবে। ইকোপার্কে ফলজ, বনজ ও ঔষধিসহ প্রায় দশ হাজার গাছের চারা রোপন করা হয়েছে। যা প্রাকৃতিক পরিবেশ রক্ষায় ভূমিকা রাখবে। এখানে পাঁচতলা বিশিষ্ট একটি ওয়াচ টাওয়ার, ছয়টি চাইল্ড রাইড ও একটি ঝরনা রয়েছে। প্রধানমন্ত্রী শেখ হাসিনা কর্তৃক ২০১৮ সনে বাংলাদেশ আওয়ামী লীগের নির্বাচনী ইশতেহারের অঙ্গীকার বাস্তবায়নে ঢাকা শহরের চারিদিকে নৌপথ উন্নয়ন, সংরক্ষণ, সৌন্দর্যবর্ধন ও চালুকরনের কার্যক্রম চলমান রয়েছে। বৃত্তাকার ১১০ কিলোমিটার নৌপথের বুড়িগঙ্গা, শীতলক্ষ্ম্যা, তুরাগ ও বালু নদীর তীরভূমিতে সীমানা পিলার, ওয়াকওয়ে, জেটি, ইকোপার্কসহ আনুষঙ্গিক কাজের প্রকল্পের আওতায় দৃষ্টিনন্দন টঙ্গী ইকোপার্কটি নির্মিত হয়েছে। এ প্রকল্পের আওতায় অপর দুটি ইকোপার্ক বড়বাজার (গাবতলী) এবং হাজীগঞ্জ ফেরীঘাট (নারায়ণগঞ্জ) এলাকায় এবছরের ডিসেম্বরের মধ্যে সম্পন্ন হবে। বাংলাদেশ অভ্যন্তরীণ নৌপরিবহন কর্তৃপক্ষ (বিআইড্রিউটিএ) কর্তৃক সম্পূর্ণ প্রকল্পের বাস্তবায়ন কাল ২০১৮ হতে জুন ২০২৩ পর্যন্ত। প্রকল্পটি বাস্তবায়নে প্রাক্তিনিত ব্যয় ধরা হয়েছে ১,১৮১ কোটি ১০ লক্ষ ৩১ হাজার টাকা। নৌপরিবহন প্রতিমন্ত্রী ঘোষণা দেন -টঙ্গী ইকোপার্কের নাম আহসান উল্লাহ মাস্টার ইকোপার্ক হবে।

১০/১/২০২২
 মো. জাহাঙ্গীর আলম খান
 সিনিয়র তথ্য অফিসার
 নৌপরিবহন মন্ত্রণালয়
 ০১৭১১-৪২৫৩৬৪